

# Više od 200 poginulih u Homsu

4 februar 2012 Izmijenjeno 08:14 CET

**Aktivisti kažu da je glavna bolnica prepuna nakon što su vladine snage rasporedile tenkove i minobacače**



Vladine snage koristile tešku artiljeriju protiv demonstranata u Homsu [AFP]

Najmanje 217 ljudi je poginulo u novoj vojnoj ofanzivi u centralnom sirijskom gradu Homsu, saznaje Al Jazeera, pozivajući se na sirijsku grupu za ljudska prava Syrian Observatory for Human Rights sa sjedištem u Britaniji. Vladine snage upotrijebile su tenkove, artiljeriju i minobacače u napadu koji se dogodio rano u subotu u naselju Kaldijeh, uporištu oružanog otpora režimu predsjednika Bashara al Assada. Al Jazeera's Maysa Khalaf koji izvještava iz Beiruta navodi da je "bombardiranje oblasti počelo nakon što je opoziciona Slobodna sirijska armija napala nekoliko vojnih kontrolnih punktova i ubila oko 10 vojnika". Aktivisti kažu da je više desetina kuća uništeno granatiranjem i da je glavna bolnica prepuna ranjenih zbog čega su napravljeni improvizirane klinike u džamijama, javila je RIA Novosti.-

## Obljetnica masakra u Hami

Jedna osoba je ubijena u zapadnom gradu Hami tokom gušenja protesta. Građani u Hami namjeravali su puštanjem hiljadu crvenih balona obilježiti 30. godišnjicu ubistva više od deset hiljada ljudi koje su 1982. pobile snage Hafeza al-Assada, oca današnjeg predsjednika Bashara, gušeći islamistički ustanak u Siriji. Reuters javlja da je osam vojnika ubijeno u sukobima sa vojnim dezerterima u južnoj provinciji Dara, a da je sedam ljudi ubijeno u provinciji Damask. S obzirom da je neovisnim medijima ograničen pristup događajima u Siriji, nemoguće je provjeriti ove navode.

## Al Jazeera među sirijskim aktivistima

U međuvremenu, članice Vijeća sigurnosti UN razmatraju novu rezoluciju o Siriji, koja je donekle izmijenjena da bi se udovoljilo zahtjevima Rusije. Novi tekst, koji je podnio Maroko, više ne poziva eksplicitno Assada da preda vlast i odbacuje stranu vojnu kampanju protiv sirijskog režima. U ovoj rezoluciji "poziva se sirijska vlada da odmah okonča kršenja ljudskih prava i napade protiv onih koji mirno ostvaruju svoju prava na izražavanje i mirno okupljanje".

Prema podacima UN, najmanje 5 400 ljudi izgubilo je život tokom obračuna sirijske vlade sa demonstrantima od marta prošle godine. Sirijske vlasti za nasilje krive oružane bande povezane sa al-Qaedom i tvrde da je ubijeno više od 2.000 policajaca i vojnika.

Izvor: Al Jazeera